

Evening Dogri (NSD)

09-12-2025

खबरां

1. लोकसभा च अज्ज चुनां सुधारें पर विशेष चर्चा शुरू कराई गई, राज्यसभा च राष्ट्रीय गीत वंदे मातरम दे डेढ सौ बरें पूरे होने दे सिलसिले च विशेष चर्चा दा सरिस्ता।
2. केंद्रीय गृह मंत्री अमित शाह होरें आखेआ ऐ कि वंदे मातरम पर संसद च चर्चा कन्नै नौजवानें ते औने आहिलें पीढ़िं गी एहदे महत्व गी समझने च मदद होगी।
3. राष्ट्रपति द्रौपदी मुर्मू होरें अज्ज 2023 ते 2024 बरें लेई राष्ट्रीय दस्तकारी सम्मन भेंट कीते ते आखेआ जे दस्तारिया स्थायी सांस्कृतिक पंछान गै नेई, सगुआं लोकें दी रोजी-रूटी दा बी महत्वपूर्ण जरिया न।
4. गोवा च इक नाइट क्लब च अगग लगने आहली घटना दी जांच दरान मकामी प्रशासन दियां केई कमियां खामियां सामने आइयां न।
5. सिविल हवाबाजी मंत्रालय नै ज्हाजें दियां डोआरियां रह होने कारण पैदा हालात दी ब्हाई अड्डे पर जाई-जाइयै समीक्षा करना शुरू कीता ऐ।
6. रसैनी हैलें दी कालाबाजारी ते नकली हैल बेचने आहलें खलाफ पिछले 7एं महीने दरान 12 ज्हार कोला मते कारण दस्सो नोटस जारी कीते गे न।
7. आई.पी.एल 2026 लेई खडारिं दी निलामी गितै कार्यक्रम जारी। ताले गेदे 350 खडारिं चा 240 भारती न।

<><><><><><>

LS-Election Reforms

लोकसभा च अज्ज चुनां सुधारें पर चर्चा होई जेदे च बरोधी धड़ें मतदाताएं दी नमैं सिरेआ नजरसानी दे कारण दस्सने दी मंग कीती। अज्ज बड़लै चुनां सुधारें पर चर्चा शुरू करांदे होई कांग्रेस पार्टी दे मनीश तिवारी होरें आखेआ जे चुनां आयोग गी मतदाता सूचिं दी नजरसानी आहली एस.आई.आर लागू करने दे कारणें गी सदन च रखना लोड़दा। उनें आखेआ जे एसआईआर गी लागू करने दा कोई कनूनी कारण नेई सेही होंदा कीजे संविधान च मतदाता सूचिं दी विशेष नजरसानी दी कोई बवस्था नेई ऐ। उनें सुझा दित्ता कि जां ते

वी.वी.पैट मशीनें दी पूरी गिनतरी कराई जा या फही पैहले आडर पर्चिएं राएं वोट पाने दी बवस्था शुरू कीती जा।

<><><><><><>

HIV-Vande Matram

राज्यसभा च राष्ट्रगीत वंदे मातरम दी 150 बरेगंड पर बशेष चर्चा जारी ऐ। कल लोकसभा च एह चर्चा 10 घंटे तगर चली ही। चर्चा दी शुरूआत करदे होई अज्ज केंद्री गृह मंत्री अमित शाह होरें आखेआ जे संसद च वंदे मातरम पर चर्चा औने आहिलियें पीढ़ियें गी एहदे असल महत्व ते गौरव गी समझने च मदद थ्होग। उनें आखेआ जे राष्ट्री गीत वंदे मातरम, देशभक्ति ते बलिदान दा प्रतीक ऐ जिन्नै आजादी दी लड़ाई दी बत्त पदरी कीती। अज्ज राज्यसभा च बोलदे होई अमित शाह होरें आखेआ जे एह इक ऐसी रचना ऐ जेड़ी भारत माता प्रति कर्तव्य ते निष्ठा दी भावना गी जगांदी ऐ। उनें आखेआ जे वंदे मातरम दी लोड़ आजादी दी लड़ाई दरान बी ही, अज्ज बी ऐ ते 2047 च जिसलै देश विकसित भारत बनी जाह्ग, उस्सलै बी होग। उनें अगे आखेआ जे सुतंत्रता सैनानी हर बैठक दी शुरूआत वंदे मातरम कन्नै करदे हे ते अज्ज जिसलै बहादर जवान बनने पर सर्वोच्च बलिदान दिंदे न तां ओहू बी वंदे मातरम गै गांदे न।

<><><><><><>

BJP Parliamentary Committee Meeting

हाल च गै होए दे बिहार विधानसभा चुनाएं च एनडीए दी शानदार जित्ते दे मगरा मंगलवार गी संसद भवन परिसर च सत्तारूढ़ गठबंधन दे सारे सांसदे गी बैठक च प्रधानमंत्री नरेंद्र मोदी हुंदा सम्मान कीता गेआ। संसदीय दल दी बैठक च उपेंद्र कुशवाहा ते संजय झा होरें बिहार च जित्ते दे मगरा प्रधानमंत्री होरें गी विजय हार पोआया। बैठक च केंद्री मंत्री राजनाथ सिंह, अमित शाह ते भाजपा अध्यक्ष जे.पी नड्डा सने कई वरिष्ठ नेता मौजूद हे। इस दरान प्रधानमंत्री मोदी होरें गी जेडीयू नेता संजय झा ते राष्ट्री लोक मोर्चा प्रमुख उपेंद्र कुशवाहा नै माला पोआइयै सम्मानित कीता।

<><><><><><>

Prez. Award

राष्ट्रपति द्रौपदी मुर्मू होरें अज्ज नमीं दिल्ली च साल 2023 ते 2024 आस्तै राष्ट्री हस्तशिल्प पुरस्कार प्रदान कीते। राष्ट्रपति होरें इस मौके पर आखेआ जे कला स्हाढे अतीत दी यादें, वर्तमान दे तजुबे ते भविक्ख दी आकांक्षाएं गी दर्शादी ऐ। पुराने समें थमां गै मनुक्ख चित्रकला या मूर्तिकला दे जरिए अपनी भावनाएं गी व्यक्त करदा आवा'रदा ऐ। कल लोकें गी संस्कृति कन्नै जोड़दी ऐ। कल लोकें गी बी इक-दुए कन्नै जोड़दी ऐ। राष्ट्रपति होरें ओआ जे स्हाड़ी सदिएं पुरानी हस्तशिल्प परम्परा गी जींदा ते सांभिए रखने दा श्रेय पीढ़ी दर पीढ़ी स्हाढे कारीगिरें दी प्रतिबद्धता गी जंदा ऐ। स्हाढे कारीगरें अपनी कला ते परम्परा गी समें कन्नै बदलेआ ऐ। राष्ट्रपति होरें आखेआ जे हस्तशिल्प ना शड़ा स्हाड़ी संस्कृतिक पंछान दा हिस्सा ऐ, सगुआं रोजी रूट्टी दा महत्वपूर्ण स्रोत ऐ। एहू क्षेत्र देश च 32 लक्ख कोला मते लोकें गी रोजगार दिंदा ऐ। ध्यानजोग ऐ जे हस्तशिल्प कन्ने रोजगार ते रोजी-रूट्टी कमाने आहले ज्यादातर लोक ग्रांड या दूर-दरेडे इलाकें च रौहंदे ना।

<><><><><><>

Prez. Human Rights

राष्ट्रपति द्रौपदी मुर्मू होर कल नमीं दिल्ली दे भारत मंडपम च मनुक्खी अधिकारी सरबंधी ध्याड़े दे सिलसिले च लगने आहले इक समारोह गी संबोधत करडन। राष्ट्री मनुक्खी अधिकार आयोग आसेआ आयोजित इस कार्यक्रम च 1948 च स्वीकार कीती गेदी मनुक्खी अधिकारें दी सांझी घोशणा गी उजागर कीता जाह्ग। इस बरे दे मनुक्ख अधिकार ध्याड़े दा विशे ऐ- “हर रोज जरूरी-जनसेवां ते सभनें लेई सम्मान”। राष्ट्री मनुक्खी अधिकारी आयोग इस विशे दे मताबक इक राष्ट्री सम्मेलन दी मेजबानी करग। प्रधानमंत्री हुंदे दफ्तर च प्रधान सचिव डॉ. पी.के मिश्रा होर सार्वजनिक सेवाएं तगर सांझी ते माने आहली पुज्ज विषे पर मुख भाशण देडन। सम्मेलन च राज्यें दे मनुक्खी अधिकार आयोगा, राष्ट्री आयोग, सरकारी अफसर, नागरिक संगठन ते शिक्षा दे क्षेत्र दे प्रतिनिधिएं दे अलावा होर कई अफसर शामिल होडन।

<><><><><><>

Goa Fire Incident

गोवा दे हालिया नाइटक्लब अग्निकांड च मकामी प्रशासन दियां केई कमियां खामियां सामने आइयां ना। शुरूआती जांच मुजब क्लब दा निर्माण लोडचदे सुरक्षित ढंगै नै नेई हा कीता गेदा, अगग स्थालने लेई लोडचदी बवस्था बी नेई ही, हादसे दरान इमरजेंसीच बाहर निकलने आहले नेई खुल्ले ते नियमें दी अनदिक्खी करदे होई उत्थै छमता कोला मते लोक किट्टे होए दे हे। जांच च इब्बी पता लग्गा ऐ जे नाइट क्लब दा निर्माण अवैध तरीके कन्नै कीता गेदा हा ते ओहदे अंदर अगग लगने दी सूरतै च अलार्म बज्जने दी सुविधा नेई ही। जांच च इब्बी दस्सेआ गेआ ऐ जे अगग स्थालने दी बवस्था नेई होने कारण ते कन्नै बाहर निकलने लेई रस्ता नेई लब्बने कारण लोक अगग च फंसी गे।

<><><><><><>

Civil Aviation JS

सिविल हवाबाजी मंत्रालय च संयुक्त सचिव मधु सूदन शकर होरें अज्ज इंडिगो दे ज्हाजें दियां डोआरियां रह होने कारण पैदा हालात ते यात्रिएं पर एहदे असर दी समीक्षा करने लेई अज्ज मुम्बई ब्हाई अड्डे दा दौरा कीता। इस मौके उनें आखेआ कि चिरें राती मंत्रालय नै यात्रिएं गी दरपेश दिक्कतें दी गंभीरता गी समझने लेई बक्ख-बक्ख ब्हाई अड्डें दी स्थिति दा आंकलन करने दा फैसला लैता ऐ। उनें दस्सेआ जे ब्हाई अड्डा संचालकें, ब्हाई ट्रांसपोर्ट कंट्रोलर, प्रबंधकें ते एयरलाइन प्रतिनिधिएं सने सभनें प्रमुख हितधारकें कन्नै बी इस मसले पर बैठकां लाइयां गेइयां ना। इस बारै तफसीली जानकारी सांझी करदे होई उनें दस्सेआ जे सोमवार धोड़ी इंडिगो दियां ब्हाई डोआरियां रह होने कारण कुल 905 डोआरिएं च विघ्न पेआ, जिंदे नै कुल रलाइयै 2 लक्ख 66 ज्हार 567 यात्री सिद्धे तौर पर प्रभावित होए ना। उनें दस्सेआ जे मुम्बई सवां प्रभावित प्रमुख घरेलू रस्ते च अहमदाबाद, दिल्ली, बेंगलुरू, हैदराबाद, चेन्नई, कोलकाता, कोच्ची, गोवा ते लखनऊ शामिल ना।

<><><><><><>

Indigo

सिविल हवाबाजी सरबन्धी केन्द्री मंत्री राम मोहन नायडू होरें आखेया ऐ जे हाल च पैदा होए दे ब्हाई यात्रा संकट ते लोकें गी पेश आवारदियें दिक्कतें लेई इंडीगो गै पूरी चाल्ली जिम्मेदार ऐ- जेहड़ा अपनी जिम्मेदारियें गी नभाने च नाकाम रेहा ऐ। उनें आखेया जे एह दिक्कत-एयरलाइन दे अपने अंदरुनी बवस्था जेहदे च पायलटें ते चालक दल दे होरनें कर्मियें दी ड्यूटी लाने ते डोआरियें सरबन्धी योजनाएं च आई दियें समस्याएं कारण पैदा होई ना- कि

कुसै तकनीकी खराबी दी वजह कन्नै। मंत्री होरें आखेया जे इस मामले च सख्त कोला सख्ता कारवाई कीती जाहग। उनें दसेया जे सिविल हवाबाजी सरबन्धी महानिदेशक- जारी कारण दस्सो- नोटस पर इंडीगो दी प्रतिक्रिया दी जांच करा रदे न। मंत्री होरें इब्बी दस्सेया जे तौले गै इक अंदरुनी मूलांकन बी कीता- जेहदे नै इस चाली दे मामलें च जवाबदेही तैह करने दी बवस्था होई सकै। उनें अगगे आखेया जे मजूदा सब्बने नियमें ते दिशा-निर्देशें गी नमें सिरेया तयार कीता जाहग- जिन्दे च मुख ध्यान- ब्हाई सेवा दा इस्तमाल करने आहले यात्रियें दी सुविधा ते अधिकारें पर केन्द्रित होग तां जे भविष्य च इस चाल्ली दा संकट पैदा नेंई होवै।

<><><><><><>

Fertilizer-Show

मुलखै च रसैनी हैलें दी जमाखोरी ते कालाबजारी करने, नकली हैल बेचने जा नकली या घटिया किस्मै दे हैल बेचने आहलें दी नकेल कस्सने लेई सरकारै पिछले 7एं म्हीने दरान हैल डीलरें गी 12 ज्हार 814 कारण दस्सो नोटिस जारी कीते न। एहू जानकारी अज्ज राज्यसभा च प्रश्नकाल दरान रसैनें ते रसैनी हैलें सरबन्धी मंत्री जे.पी नड्डा होरें दिती। उनें दस्सेआ जे 3 ज्हार कोला मते डीलरें दे लसैंस गै रद्द करी दित्ते गेदे न। उनें दस्सेआ जे रसैनी हैलें दी जमाखोरी आहले मामले च 202 लसैंस रद्द कीते गे न ते 687 कारण दस्सो नोटिस जारी कीते गे न।

<><><><><><>

India-Nepal

भारत ते नेपाल दिएं फौजें उत्तराखंड दे पिथौरागढ़ च सूर्यकिरण अभ्यास दे 19में संस्करण दे तैहत 2 दिनें दा बटालियन सतह दा अभ्यास करोआया। इस अभ्यास च आतंकवाद रोधी माहौल च निविर्धन अंतर संचालन, समन्वित कार्य योजना ते सांझे सामरिक अभियानें दे आयोजन पर लो पाई गेई। इस दरान खुफिया, निगरानी ते टोह रखना ते सटीक नशाना लाने आहले ड्रोन, उन्नत थेआर जिंदा दिनें ते राती न्हरे च बी इस्तेमाल कीता जाई सकदा ऐ, आर्टिफिशल इंटेलीजेंस कन्नै लैस निगरानी बवस्था समेत होर कई महत्वपूर्ण तकनीकें गी किट्टा कीता जाहग। भारती सेना दे फौजी कारवाइएं सरबन्धी महानिदेशक डी.जी.एम.ओ लेफ्टिनेंट जनरल मनीश लुथरा ते नेपाल सेना दे डी.जी.एम.ओ अनूप जग थापा होरें दौनें देशें दे सहयोग दी तस्दीक करदे होई इक बूहटा बी लाया।

<><><><><><>

India-EU FTA

भारत नै यूरोपियन युनियन मुक्त बपार समझौते दी प्रगति दा जायजा लैता ते अग्रे दियें कारवाइयें कन्नै जुड़े दे मामलें गी सुलझाने लेई तरीकें गी तलाशेया- सोशल मीडिया दी इक पोस्ट च उद्योग ते बपार मंत्री पीयूष गोयल होरें आखेया जे यूरोपियन युनियन ते आर्थिक सुरक्षा कमीशनर हुंदे कन्नै मलाटी मगरा एह गल्ल आखी। मंत्री होरें आखेया जे भारत मुक्त बपार समझौते कन्नै जुड़े दे आपसी हित आहले मामलें पर चर्चा होई।

<><><><><><>

Smart India Hackathon

Smart India Hackathon दे 8में संस्करण दा आयोजन होआ रदा ऐ। इस बारे घोषणा शिक्षा मंत्रालय दी नमियें काडडें सरबन्धी सीगे MIC आसेया कीती गई ही। MIC इसदा आयोजन AICTE दे सहयोग कन्नै मुख्य भरे दे 60 नोडल केन्द्रें च करा रदा ऐ। एह Smart India Hackathon कल्लै थमां शुरु होई ऐ। इस बरे दे Smart India Hackathon आस्तै 68 ज्हार- 766 विद्यार्थियें दियें टीमें 72 ज्हार 165 विचारें गी सौंपेया ऐ। इस दौरान 271 समस्याएं दा हल करोग। इस दौरान मंत्रालय- राज्य मैहकमें- PSU ते उद्योग दियें समस्याएं गी रखेया गया ऐ। इक ज्हार 360 टीमें 8 ज्हार विद्यार्थियें ते 13 सौ Mentors नै Grand Finale लेई अपनी थाहर बनाई लैती ऐ।

<><><><><><>

IPL-2026

आई.पी.एल-2026 लेई खडारिएं दी फाइनल लिस्ट जारी करी दिती गई ऐ। ऐकती एहदे लेई खडारिएं दी निलामी 16 दिसंबर गी आबू धाबी च भारती समें मताबक दपैहरी ढाई बजे शुरू होग। कुल 1 ज्हार 390 खडारिएं एहदे लेई अपना नांऽ दर्ज कराया हा जिंदे चा 350मीं निलामी च शामिल करने लेई तालेआ गेआ ऐ। शाटलिस्ट कीते गेदे 350 खडारिएं चा 240 भारती ते 110 होरनें मुल्ले दे न। कुल लाई पाइयै इस बारी मते हारे नमे ते होनहार खडारिएं दी भरमार होने दी मेद कीती जा'रदी ऐ। ऐकती सभनें शा बड्डा रिजर्व प्राइस 2 करोड़ रपे ऐ ते 40 खडारिएं इस्सै श्रेणी च औने दा विकल्प चुने दा ऐ। डेढकरोड़ दी बेस प्राइस आहले 9 खडारी न, सवा करोड़ दी बेस प्राइस आहले 4 ते इक करोड़ बेस प्राइस आहले खडारिएं दी गिनतरी 17 ऐ।

<><><><><><>